



Tir Yimyim

www.tirymy.in

Regd. No. RNI. NAGAAO/2004/13113. Postal-NE/RN-717.

e-mail : tirymy@gmail.com

TAPAK 3

Yangia anidakangma : [f Tir Yimyim](#)

[tiryimym@aolima](#)

[tir yimym](#)

TAPAK 8

Bangladesh tensa mita reoprangtsü atema luden ka tentetogo: Amit Shah

Paris Olympics: Neeraj Chopra-i India asoshi silver medal ajangtet



VOL. XXI ISSUE NO. 298 (ADOK 298) DIMAPUR

KÜPTOKNÜ (SATURDAY)

LUROI (AUGUST) 10, 2024

₹ 5.00

Nagaland MP-i asüingdangba ajak "secret" ta shia melangzür

Dimapur, August 9, 2024 (TYO): Nagaland Lok Sabha MP Spongmeren Jamir-i unstarred question ana agütsüba Speaker-i magizük.

Tasüingdangba anaji India sorkar aser Naga Political Groups tsüingda tenangzüktepa ana nung sign asüba aser Eastern Nagaland People's Organization (ENPO)-i Frontier Nagaland Territory meshiba indang lir.

Tasüingdangba ana indang osangji "secret" lir aser Rules of Procedure and Conduct of Business in Lok Sabha nung Rule 41(2) (xxi) den meputep ta Speaker-i shia magizük ta NPCC Communication Cell-i sangdong

ka nung ashi.

MP Spongmeren-i kanga mepishiba nung ajemdaker Speaker-i Lok Sabha nung Rule 377 kübok Frontier Nagaland Territory atema olemteptsü temelaba agütsüogo.

Supongmeren-i Lok Sabha nung Leader of Opposition Rahul Gandhi den pa indang office chamber nung ajuruteper aser iba onük ana indang lemsatepogo NPCC-isa metetdaksü.

Lok Sabha MP Spongmeren-i pa dak tashi agüja aliba ajak agi Nagaland nung alirtem asoshi ola adoktsü tenangzükba nung masetshi noktaka lir ta NPCC-isa metetdaksü.

Haryana nung 'Jai Hind' agi 'Good morning' melenzüktsü

Chandigarh, August 9, 2024 (Agencies): Haryana nung taküm Independence Day nungi school ajak nung 'Good morning' melen a 'Jai Hind' amshitsü.

Kaketshirtemi linük meimtsü aser linük asoshi nüma atangtsü tangatetba agütsüta atema Haryana sorkari iba lemtet agiogo ta Directorate of School Education-i metetdaksü.

India nüjiso atema raradang Subhas Chandra Bose-i 'Jai Hind' ya purateta amshi aser Independence sülen armed forces-i salute ama amshitsü tenük.

Haryana directorate of school education-i district education officers, district elementary

education officers, district block education officers, block elementary education officers, principals aser headmasters ajak dangi iba tetuyuba sangdong yokogo.

'Jai Hind' ta asüba ajanga kaketshirtemi linük nüjiso atema bendanga agütsürtem nem tenüngsang agütsüta ajungmesotsü. 'Jai Hind' ya tesem, oshi aser sobaliba balala ajak alema lir aser kaketshirtem tsüingda telongiem adokdaksür ta directorate of school education-i ashi.

'Jai Hind' amshiba ajanga kaketshirtem dak tashi angaba aser külemi liromedemba tangatetba agütsüta ta pamokisa ashi.

Bangladesh tensa atema security akangshir



Dimapur, August 9, 2024 (TYO): Bangladesh nung tensa mejungi akümba ajanga Nagaland nung kongshitsü akok aser talisa ozüing alema nisungtem arutsü akok ta tarendakba aliba atema tanü senden menogo.

August 9, 2024 nü Nagaland Home Commissioner Vyasan R, IAS aser Commissioner Nagaland KS Anden Konyak, IAS nati Deputy Commissioners (DC) ajak den video conference ka ajanga senden amenba sülen osangbener den ajurutepa sensaksem.

"Asenoki Bangladesh nung tensa atema zübazülema malitsüla. District administration temi item khuret atema maparen tenükogo. District ajak nung

District Security Coordination Committees tentetogo" ta Vyasan R-i ashi.

Senden nung Inner Line Permit (ILP) mita reoprangtsüba, village councils-i pei pei temeket nung taitü aketertem reoprangshimtsü aser osang sangoktsütsü aser communication channels tashi itshitsü indang onüktem benoka lemsatep.

Senden nung Assam ketdangsurtem den amalitepa cross-border coordination tenüktsü lemtetogo ta Home Commissioner-isa ashi.

Nagaland kübok district kar nungbo ajungben mita aoba inakyim tenükogo aser arrtsülen nisungtem senzüba tesemtem mita anüker ta Vyasan R-isa ashi.

ASU-i IGAR North nem ghonda 48 züingzüktsür

Dimapur, August 9, 2024 (TYO): Angami Students' Union (ASU)-i August 10, 2024 nungi tenzüker Angami nungger aliba tesem ajak mokdangtsü ayongzük saka taonung tesü parnoki iba mokdang thina atar IGAR North nem ang ghonda 48 tsüingda mapa inyaktü züingzüktsüogo.

August 9, 2024 anüingdang 1:30 ako meta D Block Kohima nung aliba IGAR North jawa temi ASU President dak teka sangshiba sülen parnoki iba yimym ayimokja liasü.

AR jawan temi ASU President dak kechi kuli melii dang teka sangshi aser iba ajanga tensa mejungi aküm. Iba osang angashiba sülen ASU ketdangpurtem tesem tonga aodang President dak zübo keta aliba angu. Ajisüaka mezüingbo jawan temi pa dak tim masüba

kecha meinyak ta ashiba agi parnok tsüingda mangatettep adoka raratep.

"Anungji tensa tamajungba mekümdaksütsü aser public kümzük ayutsü nukjidong nung ASU-i dokan ajak shibangtsü tetuyuba agütsü. Iba ya public tiptema senzüdaksütsü nukjidong nung liasü saka iba ajanga shishilembartem nem timtem agütsüba atema sasaa bilemer" ta ASU-i taonung sangdong ka nung ashi.

"ASU nung taintem, range aser units ajanga mepishiba agizüka IGAR North nem ghonda 48 tsüingda tim masüba mapa inyakba jawan puteta army teinyaktü aser linük ozüing nung ajemdaker temerenshi agütsütsü mapang züingzüktsür" ta ASU-isa ashi.

Maneni, Assam Rifles-i yimjak nung iba tatalokba atema tatok meshitsüla aser item mapa meinyak

tashi AR pur Angami nungger lushi nung mesenzüi atatsü metetdaksür. Iba tenokdangba ya Assam Rifles senzisenbongba atema dang agütsür aser tanga maparen nungbo tetsükdaksü kecha majurutsü ta ASU-i sangdong nung ashi.

India sorkari Naga lima nungi tangsa AFSPA 1958 agientsüla kechiyong iba Act amshia nisungtem reshikangshiba aser timtem agütsüba manener. Onoki akhangba ama meinyak nungbo ozüing melaba ama lungkak aittsü, ta ASU Vice President aser General Secretary

Maneni Naga Students' Federation (NSF), All Nagaland College Students Union (ANCSU), Ao Kaketshir Mungdang (AKM) aser Dimapur Naga Students Union (DNSU) teloktemi iba tatalokba khukhua aitsüba metetdaksüogo.

Nagaland nunga Intensified IEC Campaign agitsü

Kohima, August 9, 2024 (TYO): Nüboritem dang HIV & Sexually Transmitted Infections (STIs) osang tejangja metetdaksütsü atema ita ana "Intensified IEC Campaign" alitsü.

Iba sentong ya National AIDS Control Organization (NACO) ajanga ayonga agitsü aser August 12 International Youth Day nung State aser UT ajak nung tenüktsü.

Nagaland nunga August 12 nü NBCC Convention Centre, Kohima nung NACO kübok iba campaign tenüktsü ta Nagaland State AIDS Control Society (NSACS)-i metetdaksü.

Iba campaign ya ita ana agitsü aser Nagaland kübok district ajanga nung agitsü ta NSACS-i ashi.

India nung HIV/AIDS ajanga temang anema alibaren nung

tayongzükba tulu ajurua lir, kechiyong aliba nung people living with HIV (PLHIV) teimtüba aliba linük tanabuba lir ta NSACS-isa ashi.

"2023 küm National HIV prevalence ajema lir saka India nung PLHIV lakh 25.44 shi lir. Yaküm nisung 68,450 dak HIV aliba putetogo" ta NSACS project director Dr. Ahu Sekhose-i ashi.

Chief Minister's Universal Life Insurance Scheme (CMULIS) tenzüker

Dimapur, August 9, 2024 (TYO): Nagaland Finance Department-i Chief Minister's Universal Life Insurance Scheme (CMULIS) tenzükerogo aser Chief Minister's Health Insurance Scheme (CMHIS) nung beneficiary temi iba ya angutsü.

CMHIS nung beneficiary temi life aser accidental insurance coverage nung temelenshi kar sünüra www.cmulis.gov.in nung asütsü akok. CMHIS kübok adenba kibongtem atema iba scheme indang Phase II yaser tenüktsü.

Nagaland nung aliba kibongtem nem financial security agütsütsü atema CMULIS ya renemba lir. Iba ya shilem ana lemsar inyaktü. **Phase I:** CMHIS ID aser self-registration/verification aliba beneficiary tem iba nung adentsü. Phase I nung kibong lakh 1.89 dena lir.

Phase II: CMHIS nung madenba kibongtem asoshi. Phase II atema registration yaser lapoktsü aser NSRLM-i yimtsüngtem nung registration asüba nung yariteptsü.

CMULIS ajanga tajangzük agütsübatem:

Life Insurance Coverage: Kibong ka asoshi sen aazüker ka asüba atema Rs 2 lakh agütsütsü.

Accidental Insurance Coverage: Kibong ka nung sen aazüker aser züingsem asem tashi (arishi küm 18-70 tsüingda)

ajungbena lendong nung taküm samara, nisung shia asoshi Rs 2 lakh agütsütsü.

Life Insurance Coverage for Breadwinner

General Category: Arishi küm 18-50. Kibong shiai arishi küm 18 nungi 60 tsüingda alir sen aazüker sayutsü.

Sorkar mapa inyaktertem asoshi: Arishi küm 18-60. Sorkar mapa inyaktertem mapa nungi sodi mangu tashi kibong asoshi sen aazüker asütsü. Sorkar mapa inyaker aliba kibongtem atema "change breadwinners" option malitsü.

August 20, 2024 tashi nung verification maparen tembangtsü aser iba dak sendakba osang 9436030303 ajanga metetpelatsü akok.

Iba maparen asoshi fee kecha mali aser SMS details, bank details mesüra OTP memeshitsü ta Finance Department-i metetdaksüogo.

Nü indang Details jangjatsü aser melenshitsü inakyim:

1. Portal nung log in süang: www.cmulis.gov.in lapokang aser nü indang CMHIS ID enokang.

2. Mobile Number jangjatsü: OTP amshia nü indang registered mobile number jangjang.

3. Family Details reoprang: Iba scheme kübok nür kibong nung züingsemtem aliba jangjang.

4. Breadwinner melenshiba:

Default: Kibong nung tekolakbaji breadwinner asütsü.

Melenshiang: Kibong nung züingsem tanga ka enokang (sorkar mapa inyaker melira).

5. Accidental Insurance Coverage yanglushiba:

Default: Breadwinner aser kibong nung züingsem tambusang-tantsüla asem adener. # Melenshiang: Enoka agiba agienang aser kibong nung tanga züingsemtem enokang.

6. Nominee melenshiba:

Default: Tangar atema nominee ji breadwinner lir, aser tanabubaji breadwinner atema nominee ji tambusang/tantsüla lir.

Melenshiang: Nüngdakba ama nominee details melenshiang.

Alakteta tetuyubatem:

Sorkar mapa inyaktertem: Breadwinner ta enoka aliba memelenshitetsü.

Kibong nung tasürtem: Breadwinner tasen ka enoktsü atema kibong nung züingsem tasen ka enokang.

Bank Accounts lapokba: Iba portal ajanga kibongtemi bank accounts lapoktsü asoshi teyari agütsür. Tarutsü anogotem bank account lapoktsü atema Special Camps alitsü. Item bank accounts ajanga kibongtemi PMJBY aser PMSBY ajanga additional insurance coverage angutsü.

Iba website nung inakyim osang aser video lir.

CIHSR nung Dengue awareness campaign ka ayongzük

Dimapur, Luroi/August 09 (TYO): “Beat Dengue: Our Health Our Responsibility” omen nung ajemdaker ananü Dengue awareness campaign ka National Vector Borne Disease Control Program (NVBDCP) aser Christian Institute of Health Sciences and Research (CIHSR) ajanga lungjemer LG Hall, CIHSR nung Dimapur, Chumokedima aser Niuland nungi ULB züngsemtem aser village council tem asoshi August 8, 2024 nü tienzükogo.

Iba sentong nung tesemdanger tongti ama jembidang, taoba küm Nagaland nung Dengue serotype 1 aser type 2 liasü aser taküm koba type alijar mejangja, ta State Programme Officer NVBDCP, Directorate of Health and Family Welfare, Dr. Neisakho Kere-i ashi.

Serotype 2 ya danga asem dang nungi tamajungba lir, ta pai ashi.

Dengue azüokba nung tebilemtsü tulusibaji ‘transovarial transmission’ ya lir, tetetzü iba tashidak keta aliba merila indang entzü nungya iba virus ya alir aser entzü nungi rizükba merila dak virus keta alir aser nisung mashi dak metepa tashidak menaloktsür, ta Dr. Kere-i ashi.

Anungji asenoki fogging asüba ajanga merila tepsetaka tzü nung aliba entzü ya anogo ishika lir rizüksü aser asen dak metepa Dengue virus menaloktsür ta ashi.

Iba tashidak atema vaccine shidak mali, anungji merila

zünba tesem agentsütsü aser memetepdaksütsü yam era tajungtiba lir, anungji long sleeves aser pants asemtsüla, repellent amshitsüla aser merila sü ainer mejangtsüla, ta Dr. Kere-i ashi.

Colony nung alirtem dang merila apokba nungi kumzuka ayutsü atema akok tashi pei temeket tesem kongka ayutsüla aser anogo tenet nung anogo ka dry day alitsü nungdaker ta ashitsüla, ta pai ashi.

Dry day anogo ka aliba ajanga Dengue adokdaksüba merila ajemdaksüba kisung masü saka danga vector borne diseases aika nungi kumzüksü, ta Dr. Kere-i ashi.

Merila ajemdaksüba ajanga tashidak aika ajemtsü, saka dengue tashidak tali akumer, anungji asen ki temeket nung container nung tzü aliba kongdaksütsüla aser tzü atsünga aliba rosepdaksütsüla, ta pai ashi.

Dengue tashidak adokdaksüba Aedesegypti ya peria angur, anungji nüburtemi merila apokba tesemtem memürekba mesüra meindokba sayur.

Taoba küm iba tashidak anepalutsü asoshi kanga meranga inyakogo aser karbo iba tashidak agi süogo. Iba tashidak azüoktsü merangba nung tetsükdaksü balala ajurur, aser item rongnung mezüngbubaji Dengue agi shiranga alir semdangba menokdangtetba ajanga iba tashidak agi meneper timba akumer, ta Dr. Kere-i ashi.

Ketdangsür temi kanga

merangaka iba tashidak adoka aliba tesemi nüburtem aoba menokdangteteter, anungji tashidak azüoktsü mera tali tebenjaba akumer. Iba tashidak puteta alirtem senzüsembongba nokdangtsü makoker, aser ibaji ajanga Dengue tashidak tali prokshir, ta pai ashi.

Mozüki nung dengue tashidak putettsü atema Rapid Diagnostic Tests (RDT) nung metaloka lir, saka ‘false positives’ jenti adokba ajanga RDTs nung tamang makar aser medical facilities tashi atemer.

Maneni testing laboratories kanga ajema aliba ajanga samples tendangba osang menur angur aser mozü shidak agütsüba nunga menur, ta ashi.

Mozüki nung dengue agi shiranger aser danga tashidak agi shirangertem bendanga anepalu mesüteter, aser ano mozüki nung azü peria manguba ajanga tebilemtsü tali akumer, ta Dr. Kere-i ashi.

NVBDCP Dimapur team-i colony aser ki aika sema jaja nüburtem dang Aedes mosquitoes indang entzü sayu aser itemji indoktsü yimyatem sayua jajar. Nisungtem dang Adult Aedes mosquitoes sayuogo aser dengue tashidak nungi kumzuka alitsü yimyatem sayur, ta pai ashi.

CIHSR ajanga vector borne diseases aser talisa Dengue tashidak atema awareness campaigns ayongzükba atema pai tenüngsang agütsü aser iba tashidak madak takok angutsü asoshi nisung ajaki shilem agitsü nungdaker, ta ashi.

(Maneni tapak 8 nung...)

International Day of World's Indigenous Peoples mungogo

Dimapur, Luroi/August 09 (TYO): Hokulbarnü Arunachal Pradesh kübok Naharlugun tesem nung International Day of World's Indigenous Peoples mungogo, kong north eastern states balala nungi teshimtet nisungtem dena liasü.

Iba sentong ya North East Indigenous People's Forum (NEIPF) kübok Arunachal Indigenous People's Forum ajanga ayongzuka liasü.

Iba anogomung nungtem nung sentong ka agidang, asen lisopur sobaliba jenjang wazüka ayutsü aser akhi libaliru yimya kumzuka ayutsü atema region nung lanurtem nem tashi agütsütsü nungdaker, ta Arunachal MLA Toko Tatung-i ashi.

“Asen lanurtemi wadang mashi nung toktepteter aser parnok tim lenmang nung anitsüji asenok mapa lir,” ta Toko Tatung-i ashi.

Linük tesem balala aser bendang lima nungi nisungtem arua aliba ajanga pei li nunga bendanga amshiba lisopur tarutsü tia atema bilema iba Forum ya tentet, ta NEIPF Chairman Anup Chetia-i ashi.

North eastern lisopur kumzuka ayutsü asoshi sentong ka alitsüla, ta Anup Chetia-i ashi.

North eastern states nung ‘demographic profiles’ melenshiba ya lisopur atema timtem lir. Lisopur indang yimten aser rongsenketzung temeden amokmerener, ta pai

ashi.

NEIPF ajanga ayongzükba Nortg East Essay writing competition nung Nagaland nungi Juli R Aye-i mezüngbuba jenjang ngutet aser Manipur nungi Marjing Mayanglambam-i tanabuba jenjang nguteta liasü.

Maneni Arunachal Pradesh nungi Phenya Wangsu aser Assam nungi Pankita Hazarika nati tasembuba jenjang nguteta liasü aser takok angur nem senpet aser kulizüng kaket den trophy agüja liasü.

International Day of World's Indigenous Peoples 2025 ya Manipur-i ayongzüksü aser Youth Festival of Indigenous Dance and Music sentong Dimapur nung taküm October ita ayongzüksü renem.

Technical Education ajanga NEET-(UG) atema metetdaksür

Dimapur, Luroi/August 09 (TYO): Tang academic session 2024-2025 atema MBBS/BDS & Allied courses azüngtsü asoshi forms agüja aliba NEET-(UG) candidates ajak dang Nagaland State atema NEET Merit list ya Department indang w e b s i t e www.dte.nagaland.gov.in nung upload süja lir aser Directorate

of Technical Education, Nagaland, Kohima indang Notice Board nunga inokja lir, ta Directorate of Technical Education ajanga sangdong ka nung metetdaksü.

Anungji candidates temi application form nung agüja aliba candidate tenüng, tebu tenüng, NEET score & ST rank amala kanga junga repsangtsü

metetdaksür. Metokmeperi kar lira, candidate temi office nem August 13, 2024 tashinung shidakba details agütsütsüla. Iba sülen temelenshi kecha magizüksü, ta sangdong ajanga ashi.

State reserved seats atema selection aser nomination ya mapangtong nung metetdaksütsü, ta ashi.

Mokokchung DC ajanga Ind. Day atema metetdaksür

Dimapur, Luroi/August 09 (TYO): Deputy Commissioner, Mokokchung, Thsuvisie Phoji ajanga Mokokchung Municipal Council ward 18 nungi councillor;

Ungma, Mokokchung, Chuchuyimpang aser Khensa village council aser GB union, Mokokchung Town GBs, ward ketdangsür aser Mokokchung Town nung aliba nüburtem dang August 15, 2024 nü Independence Day sentong ya akhi ama anepdang 8:40 ako nungi tienzuka Imkongmeren Sports Complex, Mokokchung nung agitsü, ta

sangdong ka nung metetdaksü. Anungji ketdangsürtem aser Mokokchung Town nung aliba nübur ajunga iba sentong nung arua adentsü ayongzük, ta sangdong ajangasa ashi.

Maneni Mokokchung District kübok Head of Department/Offices ajunga dang iba sentong nung medema arua adentsü metetdaksü.

Kasa sangdong nungsa District Head of Offices ajunga dang Rostrum tesülen attendance in-charges dang nungi attendance sheet meshitsü metetdaksü.

NSCN/GPRN (Isak) teloki saru magütsütsü mepishir

Dimapur, Aug.09 (TYO) : Mokokchung district kübok Ao Region nung shinggaia NSCN/GPRN (Isak) telok tenüng nung saru meshia arur nem saru magütsütsüla ta parnoki agütsüba sangdong ka nung NSCN/GPRN (Isak) telok nung MIP kilonser Kalong Nagai metetdaksüogo. “Onok

telok tenüng nung saru sarutsüsa kümra, Ao Region C o m m a n d e r Wb.Maj.Roker mangyang Yaden ajanga dang inyaksü aser pa den mobile number 9862883609 ajanga tongtepratep sütettsü,” ta kasa sangdong ajangasa metetdaksü.

Mokokchung nung Job Fair ayongzük

Dimapur, Luroi/August 09 (TYO): District Employment Exchange (Model Career Centre), National Career Service, Mokokchung ajanga district nung mapa bushir/zünger mapa mangu aliba lanurtem nem maongka agüja August 9, 2024 nü mezüngbuba Job Fair ayongzuka liasü.

District Employment Officer, (DEO) Mokokchung T. Yimlikhumzuk-i candidates tem den jembidang, Longpok Talent Acquaintance, SBI Life Insurance Co. Ltd, JIO Telecom aser NSDC & Skill India nungi vacancy 500-600 shi nung nübu shimtsü asoshi department den lungjemer iba sentong ya ayongzük ta ashi.

State nung zünger mapa

mangur lanur 70,000 dak tema lir, anungji iba ama maongka tajung agitsü merangtsüla, kechiaser sorkar mapa angutsü teimla ajema lir, ta pai ashi.

Mapa ya state telungzük nung dang masü danga lena lir aser bendang lima nunga oa inyaksüsa maongka angutsü, ta pai ashi.

Iba anogo company balalai candidate 127 shimtet aser nungdakba maparen ajak tembangba sülen ano screening agitsü atema company ajanga shiti yoktsü.

Iba sentong nung Principal ITI, Mokokchung, aser District Skill Committee (DSC) züngsem Imlisunep-i DSC tenüng nung department dang pelaba shia liasü.

Fazl Ali College indang Fresher's Day 2024 liogo

Dimapur, Luroi/August 09 (TYO): Fazl Ali College, Mokokchung indang auditorium nung August 9, 2024 nü Annual Fresher's Day munga liasü.

Iba sentong mezüng session nung Dr. I. Wati Imchen, Principal, Fazl Ali College aser Asensor, General Secretary, FACSU nati pela agizükba o jembia liasü.

Mr. & Ms. Fresher 2024 atema tetendanger ya Yangerjungla Pongen, FAC

Alumna & Ms. Fresher 2015, Dr. Bendangrenla S Longkumer, Assistant Professor, Department of English aser Thejatseizo Angami, Assistant Professor, Department of History nunger liasü.

Iba tetoktepba nung Mister Fresher 2024 ya Yemkhong Samuel aser Miss Fresher 2024 ya Mangyangkokla liasü.

Iba sentong nung kaketsahir temi shilem balala agia sentong tebour junga agia liasü.

Akashvani Kohima-i 'Musical Fiesta' ayongzüksü

Dimapur, Luroi/August 09 (TYO): India nunger 78 buba Independence Day nungtem nung Akashvani Kohima ajanga August 10, 2024 nü State Academy Hall, Kohima nung ‘Musical Fiesta’ ayongzüksü renema lir. Iba Musical Fiesta ya nikongdang 4:00 ako nungi tienzüksü.

Iba sentong nung Director General of Police (DGP) Nagaland, Rupin Sharma, IPS tesemdanger tongti alitsü.

Nagaland nung kin 15 nungi

ken aser sobaliba yimya balala ajanga shilem agia nüchiso aser telungjem indang tanüla tushitsü.

Iba sentong nung DGP band, Colour Keys, aser Moko Koza nunger den state nung tejangja aser nungtugu artists temi shilem balala agitsü.

Assistant Director (P) & Head of Programme, Akashvani Kohima, Abino Lasuh-i iba sentong nung Kohima nung alir ajak arua shilem agitsü ayongzük, ta ashi.

Supreme Court-i AAP lenir Manish Sisodia chioktsü tuyuogo



New Delhi, August 09, 2024: Delhi excise policy ken o nung Supreme Court-i AAP lenir Manish Sisodia nem bail agütsüba sülen Sisodia'er kinüngertem pelatepdang tangokba noksa nung angur.

New Delhi, August 09

(Agencies): August 9, 2024 nü Supreme Court bench kati AAP lenir aser taoba mapang Delhi Deputy Chief Minister, Manish Sisodia bail nung chioktsü atema tetuyuba agütsüogo, ta osang ka ajanga metetdaksü.

Bench nung züngsem anaji Justice BR Gavai aser Justice KV Viswanathan na lir.

Supreme Court bench-i, Sisodia anema ken o mangadangi pa tesüiba ita 17 tashi jail nung puoka liasü, ta metetdaksü.

Delhi excise policy ochimashi ken o dak sendakba nung yaküm March ita nung Manish Sisodia Tihar Jail nung

puoka liasü. 2021 küm November ita nung Delhi sorkari Excises Policy benok. Iba policy ajanga yi ayoktsü atema nija companies aser teloktem nem temelaba agüja liasü.

2022 küm July ita nung Delhi Lieutenant Governor, VK Saxena-i excise policy nung ochimashi liasü ta tai tonglokja iba ken o ya bushisüngdangtsü atema CBI nem agütsütsü benoka liasü, iba sülen kasa küm August ita nung ED aser CBI nati ken otem benokba sülen taoba mapang Deputy CM, Manish Sisodia densema Delhi sorkar ketdangsertem aika anema mita ao.

AAP lenirtem aika anema ken o benokba ajanga 2022 küm September ita nung Delhi sorkari excise policy ji agiena liasü aser yaküm February ita nung CBI-i Manish Sisodia pua liasü, iba sülen pai minister menden nungi anen.

Yaküm July ita nung pai bail temepishiba agütsü saka Delhi High Court-i magizük. Iba sülen October ita nunga Supreme Court bench kati pa indang bail temepishiba magizük.

July 16, 2024 nü Justices- B R Gavai, Sanjay Karol aser K V Viswanathan nungeri bail temepishiba repringhia liasü aser tatensa August 9 nü Supreme Court-i pa nem bail agütsüogo.

Tanü PM Modi-i Wayanad semdangtsü

New Delhi, August 09 (Agencies): Honibarnü Ato kilonser Narendra Modi-i Wayanad district semdangtsü aser anentsüh lendong nung takoksa angurtem nem teyari agütsüba maparen asadangtsü, ta ketdangsertem osang ka ajanga metetdaksü.

July 30, 2024 anepdang Kerala kübok Wayanad district nung atalokba anentsüh lendong nung nisung 300 dak tema süogo aser aika samar mangur.

Anüngdang 11:00 ako meta Modi Kannaur tonga aoba sülen tayimtsü nungi Wayanad nung anentsüh lendong atalokba tesemtem asadanga repringtsü aser nikongdang 12:15 ako nung

tesemtem semdanga kümzükba maparen asadangtsü.

Nikongdang 1:00 ako meta Modi leniba nung review senden ka amentsü. Iba senden nungji ketdangsertemi iba lendong atalokba aser teyari agütsüba osang tejangja pa nem metetdaksütsü.

Ato kilonserisa relief camp aser hospital semdanga anentsüh lendong nungi jenburtem ajurua jembitsü.

Brihostibarnü Kerala Chief Minister, Pinarayi Vijayan-i sangdong ka ajanga, Ato kilonser Modi-i state semdangtsü, ta metetdakja liasü.

Chief minister-isa, Ato

kongshirtem taküm tanaben asentenshir yangershitsü asoshi Central teyari agütsütsü imlar, ta metetdaksü.

Vijayan-i, "Tang tashi Centre sorkari kanga amalitepa yaridar. Iba lendong ya kanga tulu liasü, anungji lendong agi kongshiba kibongtem yaritsü aser jila tasen tentetba project balala asoshi Centre sorkari teyari agütsütsü onoki imlar," ta metetdaksü.

"Iba dak sendakba nung Ato kilonser Narendra Modi-i telemetba tajung agitsü onoki imlar. Onoki shidi ajanga pa nem iba tebilemtsü onük metetdaksüogo aser tang tashi yaritepa aruba atema pa dang pelaba lemsatepogo," ta Chief

Bangladesh tensa mita repringtsü atema luden ka tentetogo: Amit Shah

New Delhi, Luroi/August 09 (Agencies): Tang Bangladesh nung tensa kanga mejungi aliba mapang nung Hokolbarnü Union home minister, Amit Shah-i, Bangladesh nung minorities atema tensa aser India-Bangladesh tensa mita repringtsü atema Modi sorkari special committee ka tentetogo, ta metetdaksü.

Iba committee jagi Bangladesh ketdangsertem den amalitepa iba linük nungji India nungertem, Hindu nungertem aser tanga minorities kümzükba alitsü atema inyaktsü.

Committee nung tongtiji Border Security Force (BSF), eastern command nungi Additional Director General (ADG) ka asütsü, ta Shah-i metetdaksü.

Amit Shah-i X ajanga, "Tang Bangladesh nung tensa mejungi aliba nung ajemdaker Modi sorkari Indo-Bangladesh Border (IBB) nung tensa mita repringtsü atema special committee ka tentetogo. Committee jagi Bangladesh nung ketdangsertem den amalitepa India nungertem, Hindu nungertem aser yangji aliba minorities kümzüktsü atema inyaktsü. Committee

nung tongtiji ADG, Border Security Force, Eastern Command lir," ta metetdaksü.

Committee nung züngsemtemji BSF nungi Additional Director General (ADG), Inspector Generals of Police (IGP) for South Bengal & Tripura frontiers, Land Ports Authority of India (LPAI) in charge of planning & development aser LPAI secretary nunger lir.

Bangladesh nung khenpiga atema sorkar tenteta tongti lenirji Muhammad Yunus shimogo. Ato kilonser Narendra Modi-ia pa nem tenüngsang agütsüba den külemi tekaraba nung tensa süngjemtsü aser yangji Hindu nunger aser tanga minorities kümzüktsü atema mepishiogo.

Bangladesh nung kaketshirtem leniba nung tesüiba hopta ishika sorkar anema longkak aita aruba mapang nung police densema nisung 500 dak tema süogo.

Sheikh Hasina-i Ato kilonser menden toktsür tayimtsü ka nung India-i jena aruba sülen iba linük nungji Hindu nunger densema tanga minorities amakba osang aika lir.



August 09, 2024 nü West Bengal Assembly nung TMC General Secretary, Abhishek Banerjee-i taoba mapang West Bengal chief minister Buddhadeb Bhattacharjee mangjak nung asür nem akhüm agütsüba noksa nung angur.

Russian army nungi India nunger 69 chioktsü: EAM S Jaishankar

New Delhi, August 09 (Agencies): Hokolbarnü External Affairs Minister, S Jaishankar-i, Russian army nung shimokba India nunger 69 chioktsü India sorkari atadar; India nunger aika dang tiyazü nangzükba liasü, ta metetdaksü.

Lok Sabha senden nung jembidang Jaishankar-isa, Russian army nung India nungertem shimokba aser India nungertem South Asia linüktemi cyber crime ajanga shibelenbaji India sorkari süoki ia agir, ta metetdaksü.

Question Hour mapang nung Jaishankar-i, tang tashi nung India nunger 91 Russian army nung shimokba osang lir aser iba nungjagi parnok 8 süogo, 14 anendaktsü mesüra meyipa yok aser India nunger 69 chioktsü aliba onoki atadar, ta metetdaksü.

"Onoki iba ya süoki ia agir. Ni-a iba onük ya aiben Russian

foreign minister den lemsatepogo. Taoba ita Russia Tir Vladimir Putin den senden amenba mapang nung Ato kilonser Narendra Modi-ia iba onük süoka jembio," ta paisa metetdaksü.

"Timtem kaji- Russia nunger ketdangsertemi, item India nungertem jagi Russia army nung tenzüktsü atema tezüngzüktep agi ta ashir," ta pai metetdaksü.

"Ajisüaka onoki ibaji magizükteter. Tatalokba aika nung, asen sensotem dang yazü nangzükba liasü. Parnok dang nenok nem mapa balala agütsütsü ta mesüzükba sülen tesüsabo parnok Russian army nung anio," ta Jaishankar-isa metetdaksü.

Russia Tir, Putin-i Ato kilonser Modi dang Russian army nung aliba India nunger ajak anentsütsü aser chioktsü ta nangzükogo, ta Jaishankar-isa metetdaksü.



August 09, 2024 nü Kranti Diwas (Quit India Movement) anogomong nung Patna nung Bihar Congress lenirtemi Martyrs' Memorial nung tenangzükba agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR KÜPTOKNÜ LUROI 10, 2024

Peisasa litettsüla

Asenoki asen limai tangar bendangertem arua senso kuma melidaktsüner aser asen kidanga mapa inyaker tangar meyuner saka asenoki asen nungdak mapatem inyak meshira tangar teyariji tenungdaktsübasä, iba timtem jagi tanü asen lima nung asenok tangar teyari magii asen kija meliteter. Iba ama tensa mapang ka nung, asenoki Bangladesh nungertem telok telok Nagaland nung arua ali tenzüksü ta bilema shisabulur. Iba shisabuluji tebulula bulur, kechiyong odanga Bangladesh nungi nisung aika Bihar aser Assam nungi aru ama sayua nisung aika Nagaland nung ayangdagi aser ano tang Bangladesh nung yimten petsaperong adokba yagi balaka Bangladesh nung er aika par nübortem tsübuba agi par lima melitet ajentsüsa akümtsü aser itemji Assam aser Nagaland nung teimba aser temelaba jenoktetsü. Atangji, asenokibo Bangladesh nung er mapa inyaker aika angubaji temoatsü amai bilema agizüksüa akok. Item ajakji asen lima kinükksiang ajaklen kar ki asür, kar alu ayimer aser kar dokan amener ta parnok asenok mapa inyaksütsü aser asenokbo asen kolak nung anüa mepulok aser tzünglua majalok, timmedemi, tetsüng teben aser tejak ajak meti amai temesüng aser apple ama meremso-meremsoa kuma kidanga kiliri agütsüba chiyongtsü dang chiyonga tebok dang chizüker kidang mongteper. Iba jagi asenokbo Bangladesh nungertem ya asenok dang nungi teimba asen den arua ali nung dang asen nungdak mapatem ajak inyaktetsü. Iba ama tia ka nung asenoki kodaser tangar bendangertem asen lima nungi odaktsütetsü. Aluyimba nunga, tang asenoki süngo lu aser rubber lu ama tilala yimtetbajia asenoki masü saka tsümartem anir arua inyaktetsüba agi dang yimtetba mapatem lir. Aji oda, asenoki asen ki yangludaktsüba, alu mapatem inyaktetsüba, khu bendaktsüba aser dokan mendaktsüba mapatem nung tsümar ayangertem nem agütsüba sen ajakji government mapa nung ita sen agizükba sentem lir. Nagaland government sen teimbaka government mapa inyaktertem nem ita sen agütsüba nung endoker aser tesasatsüka item sen ajakji kar Rajasthan, kar Bihar, kar Assam aser kar Bangladesh leni asen lima ayangertemi bener oadoker. Ano, government sen tanüngbajia item limatem nungi aruba ayangertemi gari lenmang yangluba aser government kiojen yanglutsüba taa agizüka bener aoer. Iba amaisa asenok ajak kidangmonger kuma ao nungbo, asenoksasa soruchioka mechiyongtet, parnok maruyonga asenoki Bangladesh tashi nebo bushia aotsü. Mapa inyak metetba nung ya pei lima aser pei sobaliba kumzüka ayuba tashi keta lir. Asenoksasa onok yimkümer, nokinketer aser süchir kin nungi jazükba ta o agi jembia amongyongkala, asenoki yimboksür aser süchir süa takar akümtsüsa mapa meinyakra, yimkümer agi tebok mesüngtet pei vote aser temeten ayoktsü aser Rajasthan, Bihari aser Bangladesh nungbaer kidang chisu judaka yur asenok vote agütsütsüa parnok dang asüngdangtsüsa akümtsü. Item kintem soyapokyaba nung asenoki memeneper, asenok ka asodang, parnok ter asor, ibaji asenok asoshi tenükentsü mapa tulu lir. Item ama tang ajuruba tensa tia aser asen nükla nung anguba tarutsü tensa tia jagi asenok shisabuludaktsütsüla. Iba shisabuluji akoktsü atema asenoki meinyak chiyongba sobaliba tamajung ya tama endoktsüla aser meinyaki takar akümba ya menükshitsüla. Asenoki asenoksasa asen peribo aluyimtettsüla, asenoki asen peribo shi, ango, mamatzü aser entsübo angutsüsa inyaktetsüla, asenoki asen nübortem nungdaktembo yoka dokan mentetsüla aser asenoki asen nungdakbo züsentetsüla aser yanglutetsüla. Iba amaji kodang asenoki asen mapa nung bendanger ayangertem manioktsüsa inyaktetdir, idangji Bangladesh nungi ozüng alema nisung jenti asen limai arutsü shisabolutsüba masü saka parnoksa parnok pei lima bushia aotsü. Aji oda, asenoki asenoksasa asen khu benra, kiojen yanglutetra, alu yimtetra aser dokan mentetra, ibaji dang asenok asoshibo nüchiso anguba anogo asütsü. Ibaji kaketsahir aser lanurtemi tanü mapa kuma inyaktetsüla. Ibaji atema shinga atatsü menüngdaker, aji aseni tenzüksü.

OLEMSABANG

Tanü asenok tebutep agi telongjem nung mera-a aotsü leman lirdo!

L. Imlikokba Imsong, Ungma

Asenoki jongjonga meshisadanger tang ashi, katia kakia ni tama, nabo iba sülenjiang ta zülutepba ya angudang aser angashidang jogo jongjonga laktetogo. Khristar wadang nungbo ni tama, na tama, pa tama, la tama ta mezüngoktsü südi. Kechiyong shibai Tsüngremi melongba nung teyimi alir ajiang Pa tsüngdang tagizüktetsü alitsü südi ta teti shisadanga aliba iba sabang ajanga lemsateper.

Konang nungsang aser tetushi arishitepa oboula, obala nunger par-a par mapang leptept tsüngtet tensa agi yamaji tang liyonga aliba tensa nungji Tsüngremi asen tenem kinji apayu südi ta shisadanger. Aji oda alima tatem külen nungi arua Assam lenden nung anenzüka alir Dr. Clark, kinungtsü aser teyaritepertemi tenem kin dangi atutsü asen nisungtem den jembiteper aser Süpongmeren-i anir Mulongkimong nungi melongteba liasü ta-sa angazük. Kechiyong tenem kinji ano tekolak bushiba manen liasü nung tetsübu tensa liasü. Item jagi yimsüsür (Mulong) den jembiteper atutsü renem aser parnok Sibsagar nungi Mulongkimongi atudang arkendanger (Security) teperi den Mulong donga atutet.

Yimdakji lia aodang Khristan yimsüji agizüka bakti-a Arogoji tezük südi. Namena (detail) zülur masüji aibelena aser zütokka alitsü akok. Saka koma tenzüka koda oa liasü koma aor aser tarutsü asoshia koda ta shinürba tang. Küm ishika liyonga arudang aki tsürabur yimsü aser Khrista yimsüji kodasür puteptsü - alimapur aser tamanger naji külemkija, achi achem, amongtsümong aser libaliroji ken agi

balala liasü. Anungji balala alitsüsa akum südi. Mulong bo Mulongsasür yimsen kumaadok. Mezüng baktia arogoji tenzüka tasenbai aor denji ano tasenang (amangbapur) senür item nisungtemtosa agi yimsenji akum südi. Au tasenbaji küm paikaji lir-ang ta tejenbaji iba selenjiangaka ta, saka taseni aorji tejenba nungji Khrista yimsüji magizüki ali asü kela asenok Khrista yimsüji kong, koda aser koma tenzüka tajemdakdak makatsüba-a tu. Ao lima tanem tanemi Khrista yimsüji agizükyonga aor ta angur. Oboula nunger alimapur yimsü o tamanger (Khristan) na yimsüng shia nungji meputep aliba ajanga okatsüka kongsa koda aser SDO (Sahib nunger) courti okadaki atuba tatalokba aikasa otsü lir. Tetezü tamapur (tamanger) koma timatem, toudhi ajuru alitsü ta shisadanger. Kechiyong tanü asenok aliripo ajaki maremlah.

Anungji ka-ang shidak-a ta ka-ang shidaka ta, aser ABAM-i Jubilee ka aruli ka medentsüli, ano Jubilee tanabuba nung ka medentsüli ta tatalokba liaka "JOGO OJANG SÜANG! MULONGKIMOMG, MULONGYIMSEN ASER ABAM".

Ajakji kong koda aser shirnoki Khristan yimsüji agizüka arogoji tenzüka 'kenü yongi amongtsü tim'. Asenok Khristan yimsü dak amangertembo tanü alir ya tai temenen ya jogo ojang tang menalokti. Asen Tsünger mi mulongba-a aji tang asütsü südi.

Laishiba nung aguba agia asen Tsüngrem ya tebo Yosep tetsü Mari na Bethlehem-i tenüng züludaki ao nung tanendak ka tanga mangu, tesü nashi ki ka nung anenzük (koma timtem nung lir asütsü!) Ano iba denji tanur amongtsü mapang atong, kinü tanur Yisu Tsüngrem chir aseni amangbaji soa dok. Iba timtem toudhi denji Yosep, Mari aser kinü tanurji bener Herod chuba ozüng tsübua nashi ki nungjia mekazütetsüsa jena mao majung tensa ajakji Yoseper kibongi tenji aser aremzüka.

Yisu tain kümer ain agi nükpoker ngudaktsü, tsüngtsüker jajadaktsü, tasür-a shia arudaktsü aser Yamala saytatanya ain mapa inyaktet laishiba nung nibo munguaka pa sülen anidakertem aika Kibur-i inyaktetgiji tera angaaka oa aser nema tanga nüpurtem dang sayur südi. Aser tasütsü anogo ishika lia Yisuiji Yirusalem-i aidang yimbu- temang na nübör temi Yisu amenba gadoji-a süng ali nung majemdakdaktsü süngo manung tang jajadaktsü. Komaka wangshia tushia liasü. Kechiyong tanü alima chuba-asüng apur oa tushiba dak alia mali. Pa-bo doktsür pa amenba-a süngla alidak majemdakdaktsü. Aser pa kangki nung agenloka südaktsü, saka tasü madak takok ngua shia aruaka "pa nashi ki nung aso" ta memelen aser tanü tashi memelener.

Asenoki jungjunga meshisadanger ashi asenok mezüngmeshiba aika rongnung kar yamai :-

Indian Army-i rishikangshiba mapang asenok tekülem tenla kidang tetsür tebor tangsa shi nung medemang ta merenshia rishikangshiba tatalokba-a lirdo.

Taoba küm Ishika tejakdang RSS President Zunheboto-i atua asenok tamanger tenla ki, koba Asia ajonga nung tulutiba ta züngshir, repanger ao ta osang nungsa nguogo. Aser iba sülen Southern India len balaka Khristanem ki rongdokja aridok aser par Hindu yimsü dangi memeyipra kidangi aser yimsüngi marudaktsütsü ta ozüng agutsüba osangtemsa asenok ajaki nguogo.

Mulung nungji Khristan yimsü agizüker kumzüng 150 ajongba mong sentong memetet a masü nung kasa anogo nungji (aki nung ken tanga matushi i toktsür) Indian President Kohima-i atutsü jilia District ajonga nungi HoD ajak atentsü ta osang sangoktsü.

Ano tanü asüng osang nung anguba agi Madhya Pradesh state nung Khristan School ka nung Mary aser Peter noksa agizukdaktsü aser par Hindu tsüngrem Saraswati noksa aser temaitsü yutsü aser idakji mekongshitsü ozüng agutsür ao. Tatalokba kaji Mulong yim ka anasa yim ka nung Muslim nungertem tenem ka nung mesemtetta yur yangnungjagi tanurtem jar oa suoshia, achiajemtsüa aser kaket shisatsüa angazükdakli ta liasü. Aji metetta, Dr. Clark Sahib aser Mokochung SDO Sahib nati jembiteper tesü Longkhum nunger tasü tait Dobashi ka dang ashi nung pai yimer tashikar nisung peria anir lua yim ka nungji anenzüka liyah nungi repranger Dobashiba kulok sangra ajanga Muslim nunger dakji eka meiaka odaktsütet ta otsü lir. Ya ajak Tsüngremi asen Aor dang aochiba ta shisatetter. Aji ka meinyaktet asübo asenok Aor Muslim yimsü agizüka amanger aika lila.

"TEMEIMBATEM, TANGARI MEZÜNGMESHIBA ANGATETA ASENOK TEMEIM, TEPUTEPT NUNG MEJAKA ODI TA AYONGZÜKER".

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger i angateta agitsü mepishir

Pakistan nung Khristan anati Tsüngrem mezüngmeshi ta tai tongoktsü



Yaküm August 19 nü Pakistan kübok Jaranwalla nung Tenla ki aika rongdoktsüba sülen anogo asemnü lir Khristantemi longkak aitdang tangokba noksa nung angur.

August 09, 2024: Pakistan nung Khristan tetsür anati Tsüngrem mezüngmeshiogo ta Muslim nunger kari tai tongloktsüba sülen Pakistan nung meimchir temeden atema inyakba telok kati ibaji sashia aitsüba den külemi sorkar ketdangsertem dang linük nung Khristantem densema minorities kümzüksü mepishi.

Linük nung minorities nem tiyazü nung maneni tai tongloktsüba ya anentsüla, ta August 7 nü Human Rights Forum Pakistan (HRFP) Tir, Naveed Walter-i sangdong ka ajanga metetdaksü.

“Linük nung Khristantem ya nütüsing ajema alirtem asüba agi parnoki pei linük nung süaka parnok kümzükä mali ama bilemer. Minorities ajak nem temeden agütsütsüla,” ta pai ashi.

August 07, 2024 nü Pakistan nung Punjab province kübok Saddar Gojra nung Khristan aianu ana- Sonia Masih aser Saima Masih nati Tsüngrem mezüngmeshiogo ta tai tonglokja police station ka nung ken o benokogo.

August 6 nü Muslim nunger Mohammad Haider-i, Sonia-i jana indokba tesem nung indokba jana nungji pai Quran kaket nungi tapak kar shisar angu, ta tai tongloktsü.

Tasüngnü Haider-i Hammad Ali aser Khan Suba na ayongsemer Sonia'er kidangi ao.

Walter-i, “Khristan aianu na densema Pakistan nung tiyazü nung tai tongloktsüba Khristantem atema tebilemtsü katsür,” ta metetdaksü.

Paisa, “Tatalokba tasen aika adoker, kechiyong tesüiba

mapangtem indang ken otem mapang talanglang mebanteter,” ta Walter-i ashi.

Taküm May ita nunga Muslim nunger 1000 dak temai arrshi küm 74 Khristan, Nazir Masih dak kanga mejungi azük aser par ki den pa meyong tsüngsem factory rongdokja liasü.

Nazir Masih-i Quran kaket nungi tapak kar shisa, ta pa nem tai tonglokja lokti jagi pa dak azükba sülen pa hospital nung temongdak mapang June 3 nü süogo.

Pakistan linük nung Islam yimsü mezüngmeshiba mesüra ainkar Muhammad mezüngmeshibaji ozüing alema lir. Iba ozüing kübok aibelenertem taküm piyong tepuokdak ayur mesüra tasüba temerenshi obendang-a agütsür.

Linük aika nung yimsü temeden liaka Khristantem reshikangshir

August 09, 2024: Linük aikati pei linük nung sensotem nem tamangba yimsü temeden agüja lir, tabo jembir saka mamangertem den osangtajung lemsatepba atema Khristantem tepuokdak ayur, ta International Christian Concern (ICC)-i metetdaksü.

Algeria, Cambodia, Malaysia aser Yemen densema linük aika nung temzüng kübok tamangba yimsü temeden agüja lir, ajisüaka item linüktem nung Khristantemi pei yimsü benshiba aser sayutsüngiba atema ketdangsertemi Khristantem anema inyaker.

Algeria linük temzüng ajanga senso ajak nem pei yimsü benshitsü atema temeden agüja lir, ajisüaka Muslim nunger masüba nisungtemi Islam yimsü toktsür Khristan yimsü agizükertem temeden atema ola madokteter, ta ICC-i metetdaksü.

Iba dak alia Algeria nung Khristantem shirnoki Muslim nungertem den Yisu Khrista indang lemsatepdir parnok anema ken o benoker mesüra

Muslim nunger nem Laishiba agütsüra ibaji ozüing alema lir.

2021 küm Algeria nung pastor, Rachid Seighir indang bookstore ka nung Laishiba aser Khristan kaketter anguba sülen ketdangsertemi pa pua küm ana tepuokdak ayuba den külemi senchi dollar sen 3,500 shi achi.

U.S. Department of State-i ashiba agi, Algeria nung Muslim nunger masüba nisung kati Muslim nunger ka tanga yimsü dangi meyipdaksütsü makok. Iba dak alia Muslim nunger ka nem tanga yimsü kaketter mesüra audiovisual osettem agütsüra ibaji ozüing alema inyakba ama züngshir.

Yemen linük temzüng nung yimsü temeden indang shia mali saka pei tebilemba sademsadema jembitsü atemabo temeden agüja lir.

Cambodia linük temzüng nung tamangba yimsü temeden agüja lir ajisüaka tanga yimsü amangertem yimsü meyipdaksütsü atema inyakba mapatem memelar.

Cambodia nung yinjank nung

Buddhist yimsü indang sayutsüngiba dak alaka tanga yimsütem indang sayutsüngitsübo khenyongi memelar.

Yamaji Malaysia linük temzüng nunga sensotem nem yimsü temeden agüja lir saka Muslim nungertem tanga yimsü dangi meyipdaksütsü atema inyaksangshibabo nokdang aser ozüing ajanga memelar.

Küm tenet tejaklen Malaysia nung ketdangsertemi Malaysia nunger pastor Raymond Koh apuba sülen pa tang tashi kong aliar memetet. Pastor Koh-i Muslim nungertem dang sayutsüngia Khristan yimsü dangi meyipdaksütsü merangba sülen ketdangsertemi pastor anema bushisüngdanga liasü.

Linük aika nung tamangba yimsü temeden agütsür, saka Khristantem ola madokdaksütsü meranger aser pei yimsü lemsateptsü/sayutsüngitsü atema Khristantem nem temelaba magütsür, ta International Christian Concern-isa metetdaksü.

ANOGO ABEN TSÜNGREM DEN


Temenenpur den Tsüngrem

“Kechiyong asenok ano temenen nung alidang, pa chir tasüba ajanga asenok Tsüngrem den putepdaksü süra, idakji chia asenok putepa ali nung, pa Chir taküm agi asenok kümzüksü shiba ajanga asenoki tang teputepba nguogo, pa ajanga asenoki Tsüngrem dak pelar” (Rom 5:10,11).

Tebu Tsüngremi lenmang balala ajanga asenok pa den longjema alitsü atsür; anir aotsü meranger, nisung ka tamang lenmang amaji dang tangar kajia asütsü ta bilembaji tai tangatetba asütsü. Temulung meyipba jagi asenok tai lenmang nung alibaji angatetdaksür.

Nisung shiaji balala, aser tapusodak tesemjia balala nungi apusor, aser asenok kong lir idakji Pai asenok den mapa inyaker. Richard Baxteri ashir: “Tsüngremi nisung mulungjang ajak kasa onük kati lenmang ajak nembanger; mera aia ogo aser Tsüngrem den telungjem mali ta angatetba, aser teimla makai alidang Khristai jungtepshitaksü ta angatetba. Shitakba Khrista yimsüji Tsüngrem metetba taküm terenemba akaba - iba taküm tang yangi tenzüker.

Kaketzülor aser sayutsüngir, Don Double alima nungi pilaogo



Don Double

August 09, 2024: Nüngtugu sayutsüngir aser kaketzülor, Don Double alima nungi pilaogo; pa arrshi küm 90 liasü.

Talisa pai ‘tanepsüba crusades’ aika ayongzükä agiogo. Tesüba küm aika pa leniba nung ‘Good News Crusade’ ministry-i (tangbo ‘Edge Ministries’ ta ajar) UK nung healing crusades agia aru. Sayutsüngir, Carl Beech-i Edge Ministries nung Double melenzükogo.

Carl-i Facebook post ka ajanga, “Yashi Steve Double aser Anne Double na ajuruba mapang nung sayutsüngir, Don Double alima nung wadang tatembanglen kati arudar, ta kü nem metetdakja liasü. Tanep ni kidangi shilangba mapang nung pa alima nungi pilaba osang ni angashi,” ta metetdaksü.

Paisa, “Don ajanga nisung meyrjang aika taküm nung

kongshio aser iba nungi ni-a densema lir. Küm ishika tejaklen pai kü dang pa indang charity ministry ji kü ket nung agütsütsü telemtetba agiogo ta ashi,” ta metetdaksü.

“Tanü asenoki ajangshiba camps, festivals aser mission mapatem ya pa leniba nung inyakba ajanga lir. Atangji pai lenmang aika lapoktsüogo aser mayimjemetetba nübur aika pai ayimjema liasü,” ta paisa metetdaksü.

“Ni pa mezüng ajurubaji GNC [Good News Crusade] camp ka nung liasü. Iba mapang nungji ni Steve-a ajuru aser kü tembar tajungtiba rongnung ka akum,” ta paisa metetdaksü.

Don Double nem akhüm agüja Carl-i, “Nai junga inyaktetogo, tenzüker tajung. Kobi melii ajurutepti. Tesüne nung anisüngzükang Don Double,” ta lemsatep.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Talen

- (n) alu lenmang, nisung jajadak (path way)
- * Tanü asüngbo aluyimer mali talen kanga azünga kümogo.

Talenba

- (n) azüoka ayuba oset aser mapa (fastening, controlling)
- * Azü sentaka ayuba talenba süngzü ajak salar ajen.

OLONG PAITEP # 6891

	1	2		3		4			
									5
						6			
7			8						
					9				
		10							
	11								12
13				14		15			
16									
		17							

TIPIEN

- 2. Külen dang masü - (6)
- 6. Suwar masü - (4)
- 7. Temekoki ali nung tsükdak - (6)
- 9. Ali agi akümba - (4)
- 10. Tanishir - (5)
- 11. T _ _ _ _ sa - (4)
- 14. Asüngdangba ashi - (6)
- 16. Saklok - (4)
- 17. Arem shiruru ka - (6)

LANGTSÜNGLEN :

- 1. Ammang ozü - (5)
- 2. Tekabu-i tashi agi amet- (4)
- 3. Sü yanglu - (4)
- 4. Kimen - (6)
- 5. Ain tamajung - (3)
- 8. Saklok - (4)
- 9. Chiyungtsü tamajung aküm - (4)
- 10. Kiochtsü yangluba - (6)
- 12. Tsungi o shia anitet - (5)
- 13. Tzüma nung jajaba - (3)
- 14. Tanemi - (4)
- 15. Me _ _ _ _ ra - (4)

OLONG PAITEP # 6890 TELANGZÜBA


TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

NAI-A YA METETTER MA



Alima nung Largest Indoor Marine-Life Theme Park ji Abu Dhabi nung aliba SeaWorld Yas Island lir. United Arab Emirates nung SeaWorld ya 1.9 million square feet nung lapoka lir aser iba park nung dolphins, sea lions, walruses, sharks, rays aser puffins dena shiruru 100,000 tema lir.

SeaWorld® Yas Island lapoker küm ka majungdang iba naroküm ngutetogo.

Assam district kar 'Small Bangladesh' ama lir: CM Sarma

Guwahati, August 9, 2024 (Agencies): Assam Chief Minister Himanta Biswa Sarma-i state nung district kar Bangladesh den atishioa jembiogo.

"Bangladesh nung mapang ka Hindu nung ner nütüng yongsük 35% liasü saka reshikangshiba aser tamangba yimtsü tesemtem raksatsüba ajanga tangbo 8% dang lir. Assam nunga Dhubri district nung Hindu nütüng yongsük 12%, Barpeta nung 30% aser Morigaon nung 35% dang lir" ta Sarma-i ashi.

"Iba tensa nung taoksatsü keta lir. Item district nung tensa ya Assam sasep nung 'small Bangladesh' mesüka lir" ta pai ashi. "Iba ya tetsübu indang dang masü. Upper Assam district tem dak alaka tanüngba district tem Bangladesh den kasa tensa ajurutsü" ta CM Sarma-isa ashi.

Hindu nung amakba atema Tripura nung lungkak aiter

Agartala, August 9, 2024 (Agencies): Bangladesh nung Hindu nung amakba osang angashiba sülen Tripura nung lungkak aitba sentong balala agiogo.

memenepertemi timtem ajuruba osang VHP spokesperson Sourav Kanti Das-i lemsatsep. "Asen kidanger linük nung ozüng alema mapa inyaker. Hindu aser Sikh nung tamangba yimsü tesemtem, kiojen aser dokantem raksatsür. Tensa kanga majung lir, district aika nung Hindu nung kiojen raksatsüogo" ta Das-i ashi.

menenepertem kümzüka meyetetba aitsür" ta pai ashi. Mapang kabo Bangladesh nütüng yongsük nung Hindu nung 32% liasü saka tangbo 8% den teküpokba lir aser teti reshikangshi timtem ajurur, ta Das-isa ashi.

Lungkak aitertemi Bangladeshi products noktangsü, medical visas agientsü aser Tripura nungi Bangladesh-i power distribution anentsü takhangbatem agütsür.

"Panchagarh, Jhenaidah aser Jashore nung ki aser dokantem kanga mejungi raksatsüogo. Bangladesh nung tamangba yimsü dak sendakba tesemtem aser nübo agi tangar

Agartala nung lungkak aitba sentongtem nung Bangladeshi products noktangsü aser medical visas agientsü takhangba agütsüogo. Lungkak aitertemisa Bangladesh-i power supply yokba anentsü takhangba agütsür.

Meghalaya nung BSF-i Bangladeshi nung aruba meindok

Shillong, August 9, 2024 (Agencies): Bangladesh nung kar ozüng alema Meghalaya kübok East Khasi Hills district telungi aittsü merangba Border Security Force (BSF)-i noktangogo.

pungu-trok ka ajanga arrtsü adena ait ta BSF ketdangsürtemi ashi. BSF-i bendangertem aruba anguba sülen parnok meyipa aotsü ashi saka parnoki tashi mangaba agi injang khatok aser idang jiang parnok arrtsü adena meyipa ao, ta ketdangsürisa ashi.

Minister Sheikh Hasina'er sorkar loksa sülen aser kaketshirtemi lungkak aitba manenba ajanga BSF-i India-Bangladesh arrtsü kanga junga anüker. Meghalaya sorkaria aonung 6:00 ako nungi anepdang 6:00 ako tashi night curfew agüja lir aser border haats khen atema anena lir.

Manipur media fraternity-i anogo ka mapa meinyaki lungkak ait



Imphal, August 9, 2024 (Agencies): Mejangjba nisungtemi Kangpokpi district nung print material rongdoktsüba anema Manipur media fraternity-i lungkak ait aser anogo ka atema mapa meinyak.

Manipur Working Journalists Union (AMWJU) vice president Raj Nongthombam-i ashi. "Iba ya tenük yoka amakba aser media ola nembangtsütsü meranga lir. Ozüng amertemi iba tatalokba süoki ia agitsüla kechiyong media amakba ya democracy amakba lir" ta pai ashi.

belentsü atema ayongzüka arur. Mapang talangka print materials abenba truck garitem nem timtem kecha magütsüi dang aruogo saka ajungbena mejangjba nisungtemi Kangpokpi district nung print materials rongdoktsüogo" ta pai ashi.

Iba inyakim ya state media tebang nembangtsütsü atema inyakba aser freedom of speech, rights aser expression anema lir ta media fraternity-i ashi.

National highways nung sepaitem mapa lezmükjaka iba ama lendong atalokba atema jashir ta Raj-isa ashi.

Ozüng amertem aser talisa Manipur security adviser ajanga iba mapa inyakerem merenshitsüla. Bangdakpurtemi print materials rongdoktsüba atema temenok agütsütsü aser national highways nung security peria agütsütsüla ta Raj-isa metetdaksü.

"August 7, 2024 nü Kangpokpi district nung print materials rongdoktsüba atema onoki lungkak aiter" ta All

"Tensa mejungi akümba sülen nungi media fraternity-i National highways 2 aser 37 nung print material timi

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
 NAGALAND : KOHIMA
 NO.DET-2/14/2001/PT-II/ Dated Kohima, the 9th August 2024

RE-ADVERTISEMENT

In continuation to Advertisement of even number dated 29/06/2024, some seats are still available in the following Govt. ITIs. In this regard, eligible candidates may contact Principal/Officer-in-charge of the concerned Govt. ITI for selection/admission along with relevant documents on first come first serve basis, from 13/08/2024 to 31/08/2024. Further, candidates who are not selected in the recently concluded Entrance Test, if interested may also apply in other ITIs in their preferred trade where seats are available.
 *All other conditions remain the same as advertised earlier.

SESSION: 2024-2025/26

Sl.No	Trades	Duration of Course	Minimum Educational Qualification	Name of Govt. ITIs	
				NCVET	SCVT
A. Engineering Trades					
1.	Wood Work Technician (Carpenter)	1 year	8 th Passed	Phek, Wokha, Tuensang, Kiphire	Mon.
2.	Plumber	1 year	8 th Passed	-	Phek, Zunheboto.
3.	Welder	1 year	8 th Passed	Kohima.	-
4.	Mason (Building Constructor)	1 year	8 th Passed	-	Kohima.
5.	Mechanic Diesel	1 year	10 th Passed with Math & Science	Kohima.	Tuensang
6.	Electrician	2 years	10 th Passed with Math & Science	Mokokchung, Wokha	Tuensang, Zunheboto
7.	Electronic Mechanic	2 years	10 th Passed with Math & Science	-	Mokokchung
8.	Fitter	2 years	10 th Passed with Math & Science	Kohima	-
9.	Draughtsman (Civil)	2 years	10 th Passed with Math & Science	Kohima	-
10.	Mechanic Motor Vehicle	2 years	10 th Passed with Math & Science	-	Phek
11.	Surveyor	2 years	10 th Passed with Math & Science	Kohima	-
B. Non- Engineering Trades.					
NCVET					
1.	Basic Cosmetology	1 year	10 th Passed	-	Phek, Chümoukedima.
2.	Computer Operator & Programming Assistant (COPA)	1 year	10 th Passed	Mokokchung, Zunheboto, Mon.	Wokha, Chümoukedima.
3.	Knitting	1 year	8 th Passed	-	Kohima, Mon.
4.	Sewing Technology	1 year	8 th Passed	Chümoukedima, Kiphire.	Mon, Tuensang, Wokha, Phek, Zunheboto.
5.	Stenographer Secretarial Assistant	1 year	10 th Passed	-	Chümoukedima, Mokokchung.

Sd/-
KOVI MEYASE, NCS
 Secretary
 & Ex-Officio Director (HoD)

GOVERNMENT OF NAGALAND
DIRECTORATE OF TECHNICAL EDUCATION
 NAGALAND : KOHIMA
 Dt. Kohima, the 9th Aug., '2024.

NOTIFICATION

NO.DTE/ESTT-2/NEET/01/2024-25/ This is to inform all the NEET-(UG) candidates who have submitted forms for undergoing MBBS/ BDS & Allied courses for the current academic session 2024-2025, that the NEET Merit list for the State of Nagaland is uploaded in the Department website: www.dte.nagaland.gov.in and also in the Notice Board of the Directorate of Technical Education, Nagaland, Kohima.

The candidates are therefore informed to thoroughly cross-check the details furnished in the application form such as; Name of the candidate, Father's Name, NEET score & ST rank.

In case of any discrepancies, the candidates are informed to provide correct details to the office of the undersigned on or before 13th August, 2024. Thereafter, no correction or changes in any manner shall be entertained.

Selection and nomination to fill up the State reserved seats will be notified in due course of time.

(ER. VIPULHOU LHOUNGU)
 Director

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
 NAGALAND : KOHIMA

NOTIFICATION

Dated Kohima the 7th August 2024

NO.DET-2/14/2001 (PT-II)/481. List of candidates selected for undergoing training at various Govt. ITIs for the academic session 2024-25/26 is hereby declared by the Selection Board. Candidates may check the result from the Office of the respective Govt. Industrial Training Institutes.

Candidates who were not selected in their preferred trade may apply in other trades where seats are available in the same Govt. ITI or in other ITIs if interested, along with relevant documents as advertised earliest.

N.B.:

- Admission will commence from 13/08/2024 till 31/08/2024. No further admission will be entertained after the expiry of last date.
- Class/Training will commence from 10/09/2023 (tentative)
- Admission fee = Rs. 4,450 /-
- Original Documents to be produced at the time of admission.

Sd/-
KOVI MEYASE, NCS
 Secretary
 & Ex-Officio Director

DR Congo military court-i telungpur 26 nem tasüba temerenshi agütsü

Kinshasa, Luroi/August 09 (Agencies): Democratic Republic of the Congo nung military court kati taoba ita tatemlen nungi ken o jembitenzükba sülen M23 densema telungpur telok balala nung shilem agiba nung tai tonglokja alir nisung 26 nem tasüba temerenshi agütsü.

Alliance Fleuve Congo (AFC) lenir Corneille Nangaa ya war crimes nung aibelenba, sorkar anema nokdakba aser mapa tamajung inyakba nung shilem agiba tai ngutet.

Nangaa aser ano dangar defendants 20 nem iba obendang ya parnok meliaka Brehostibarnü agütsü, kechiaser parnok ya tang tashi jenshia senzür. Iba ken o jembidang arua adener nisung pongu nem iba temerenshi asoshi jembishinütsü anogo pongu agütsü, ta court indang tiri ashi.

Iba ken o ya July 24 nü nungi jembitenzük aser prosecutor temi nisung 25 nem tasüba

temerenshi agütsütsü obendang agütsü aser ka küm 20 tepuokdak ayutsü obendang agüja liaüs.

Nangaa ya taoba mapang DRC indang electoral commission indang tir liasü, aser telungpur telok balala, political party aser civil society tem sorkar anema lungjemtsü nükjidong nung December ita AFC political-military movement tenzükua liasü.

M23 armed group nung züngsem kati DRC anüdoklen küm aika raraba mapang nisung aika tepset ta tai tonglokja lir.

M23 nungi tir Bertrand Bisimwa, military chief Sultani Makenga aser odongtar Willy Ngoma aser Lawrence Kanyuka nungertem anema ken o benoka jembitenzükua liasü.

Nangaa-i mejangjaba tesem ka nungi text message ajanga "Iba temangmangtsü aketba obendang ajanga onoki Congo nung democracy asoshi nokdakba nung tali ajungmesor."

ta The Associated Press news agency dang ashi.

March ita human rights organisation temi aijaka Congolese sorkari ashikülak mapa inyakba mitkartem dak tenük yoker yangluba tasüba temerenshi 2003 küm soita aliba agiena liasü.

Tir Felix Tshisekedi den United States aser United Nations mongin temi Tutsi-aniba M23 nem kidanger Rwanda-i mitkar teyari agütsür ta aitsür, shirnoki 2021 küm tatemlen nungi DRC anüdoklen alinük tuluka rakzükogo.

DRC anüdoklen telok ter dak tema lir, aser item rongnung M23 ya kanga yakyaka lir, aser 1990s nung mapang talangka nungi kija yimsüsür Mobutu Sese Seko yimli laoba sülen region nung mepetmesü tenzük.

Tshisekedi-i pa jakdang inyaka alisang Joseph Kabila-i sorkar anema nokdaksür renemer aser pa AFC nung lir ta tai tonglokja aru.

India-i tsükchir Hasina yarira amalitep akatsü tasak asütsü: BNP

Dhaka, Luroi/August 09 (Agencies): Bangladesh nung election magidang Sheikh Hasina tanaben yimsüsüba azüdokshia longkak aitba mendeni arutsü atema India-i mapang Dhaka nungi ato yaritsü ta shia liasü. India-i kilonser menden nungi alur jena Sheikh Hasina indang khuret aola Sheikh Hasina abener. India aser Bangladesh anenzükdaksüba atema Sheikh Hasina' er Awami League party nüburtet teti tangatettep nung den tsükchir Bangladesh alir, süra India-i linük ajunga masü party ka dang yarir asü?" Nationalist Party (BNP) ajanga ta Roy-i langzü.

India dang mepelaba lemsatapa Hindu nunger dak tenük liasü. India-i ozü tsükchir yokba osang aser BNP ya anti-tasak asütsü, ta BNP-i ashi. minoriti ta nüburtet angatetba indang asüngdang dang, "BNP ya Hindu anemer ta nüburtetimi bilemer. Ajisüaka BNP nung Bangladesh nung aliba kin osangbener den jembidang, ozü balala nungi lir aser tamangba yimsü ajak bhukumer. BNP indang telemtetba agiba telok nung züngsem ka ama aser iba party indang administration nung minister ka ama nung minister ka ama inyakdanga lir asünung, BNP ya angatettsüla aser iba tangatetba nationalist party lir aser kin ajak nung anidaktsü yimya temeden wazüka ayur ta ni amshitsüla. Nenoki ozü tsükchir jangja ashir. 1991 küm ni yarira, iba tangatettep akumtsübotsü tasak akumer, ta pai ashi.

BNP lenir tejen aser 1991 nung BNP-i aniba sorkar nung BNP indang standing committee nung züngsem Gayeshwar Roy-i osangbener den jembidang, ozü party-i Bangladesh aser India tangatettep nung amalitep akaba nung amanger, ta ashi.

Ajisüaka India sorkari angatettsüla aser iba tangatetba nung anidaktsü yimya tangatettep akumtsübotsü tasak akumer, ta pai ashi.

BNP-i India anema nokdakba indang asüngdang dang, "Hasina sorkar nung taoba foreign minister-i taoba

(Maneni tapak 8 nung...)

US, Egypt aser Qatar-i Israel aser Hamas dang maneni jembishinütsü ayongzük

Cairo, Luroi/August 09 (Agencies): United States, Egypt aser Qatar lungjemer sangdong ka agütsüba nung Israel aser Hamas dang ceasefire aser pua alirtem chioktsü asoshi asendenshir jembishinütsü ayongzükua liasü.

Sangdong ajanga ashiba agi, linük asem yagi "framework agreement" ka yanglutet aser mapa kuma inyaksü atema dang anünga lir ta ashi.

Israel-i ken o jembirtem yoktsü ta shiogo, koba August 15 nü Doha mesüra Cairo nung jembitsü sentong lir. Hamas-i telangzüba agüja mali.

Taoba hopta Hamas lenir Ismail Haniyeh tepsetba sülen region nung tensa mazüokteti akumtsü südi ta shisabolua alidang tang asendenshir yimjung asoshi jembitsü nungmesor. Iran-i Israel tenüng asener aser telangzüba agütsütsü nangzükua lir, ajisüaka Israel-i Haniyeh tepsetba indang shia mali.

Linük asem yagi lungjemer sangdong ka agütsüba nung tanüngba tawa shibangtsü aser menua melie tezüngzüktep

mapa kuma inyaksü asoshi August 15 nungi jembishinütsü Israel aser Hamas jaoka lir.

"Mediators ama nüngdang dang süra, telok ajaki imla aliba ataloktsüsa tanüngba inyakyim nung apu alar ama onoki inyaksü renema lir," ta ashi.

Iba sangdong nungya US Tir Joe Biden, Egypt Tir Abdel Fattah el-Sisi aser Emir of Qatar Sheikh Tamim bin Hamad Al Thani nungeri meyongnem agüja lir.

(Maneni tapak 8 nung...)

Paris Olympics: Neeraj Chopra-i India asoshi silver medal ajangtet



Paris, Luroi/August 09 (Agencies): India nunger javelin thrower Neeraj Chopra-i Paris Olympics nung India asoshi mezüngbuba silver medal ajangteta liasü.

Neeraj-i javelin ya 89.45 metres tsülokja tanabuba jenjang ngutet. Tang season nung ibai pa atema tajungtiba liasü, saka gold angutsü teperi masü, kechiaser Pakistan nunger Arshad Nadeem-i 92.97

metres tsülokja Olympic nung record tasen ka yanglutet.

Taoba Olympic record ya 90.57 metres liasü, koba Norway nungi Andreas Thorkildsen-i 2008 Beijing Games mapang yanglutet. Brehoshitbarnü javeline final nung Thorkildsen den asemen Olympic champion aser world record yanglua alisang Czech Republic nungi Jan Zelenszky nungeri repranga liasü.

Olympic ana nung kijai medal anguba India nunger rongnung Neeraj ya nisung tasembuba aser track and field nung mezüngbuba alitsü. Wrestler Sushil Kumar (2008 aser 2012) aser shuttler PV Sindhu (2016 aser 2021) nati dang iba jenjang tongteta lir.

Tokyo Olympics nung gold medal ngutetsang Neeraj-i taküm Paris Olympics nung silver medal anguba sülen, “Asen linük asoshi medal angu shia asenoki pela bilemer. Asaya yimya melenshitsu mapang tongogo. Onok mener jembitsu aser asaya tajungba kumdaktsüsü. Paris Olympics nung India-i junga shilem agiogo aser tetoktepa tashi tait liasü. Tanü Arshad anogo liasü. Ni tajungtiba agütsü, saka renloktsü tesem lir,” ta pai ashi.

“Tanü asen national anthem maten, saka tarutsü nung atentsübasa. Paris nung masüyonga tesem kar nung atentsü,” ta pai ashi.

Khen atema England manager inyaktsü Lee Carsley shimogo

London, Luroi/August 09 (Agencies): Football Association ajanga Gareth Southgate melentsü tejangia nübu ka bushiba mapang September ita Nations League asayamung atema England manager inyaktsü Lee Carsley shimogo.

Arishi küm 50 tain Carsley ya England Under-21 manager liasü, saka taoba ita Euro 2024 final nung Spain-i koker anogo ana lir Southgate anenba sülen pa melena inyaktsü shim.

“Asayartem aser international football ni kanga junga meteta lir asünung, FA-i manager tasen ka shimtsü asoshi nübu bushiba mapang ni England team len anitsü. UEFA Nations League nung temaba jenjang atongtsü nükjidong nung ni anitsü,” ta Carsley-i ashi.

Carsley ya taoba mapang Premier League midfielder liasü aser pai küm 17 football asayadang Derby aser Everton



densema club balala nungi asaya liasü.

Pa ketdangsuba leni ao aser Coventry, Brentford aser Birmingham indang caretaker ama inyaka arur 2020 küm England Under-20 coach akum.

Kobi melie Carsley ya England Under-21 indang manager akum aser 2023 küm European Championship title tashi nguteta liasü.

England ya September 7 nü Republic of Ireland den asayatsü atema Dublin-i aotsü aser anogo asem lir Finland den asayatsü.

Carsley ya Republic of Ireland nungi 40 ben asaya lir.

FA ajanga teti atema head coach ka shimtsü inyaktepa mapang Carsley-i item asaya ketdangsüa alitsü, ta FA-i ashi.

“Lee ya coach tajung ka lir aser tang senior squad nung asayar timbai pa meteta lir,” ta FA chief executive Mark Bullingham-i ashi.

“Pai iba mapa mulunga agizükba atema kanga pelar aser UEFA Nations League nung pai junga shilem agitsü imlar.”

Howard Wilkinson, Stuart Pearce aser Southgate nunger ajungai junior team ketdangsüa aruba sülen senior team ketdangsüa liasü.

Southgate-i küm ti tashi ketdang süa pa lenisüba kübok England-i 2018 küm World Cup semi-final tongtet, 2022 küm World Cup quarter-final aser 2021 aser 2024 Euros final tongteta liasü.



Mokokchung District Volleyball Association kübok Kumlong Sports Association ajanga ayongzükba 3rd Inter Ward Volleyball Tournament 2024 final Hokolbarnü asayaba nung Sungkomen Ward-i Kumlong Ward madak takok anguba sülen tangokba noksa nung angur. Iba asayamung nung Sungkomen Ward nungi Niuto-i Best Setter, kasa Ward nungi Nengshitemjen-i Best Spiker aser Kumlong Ward nungi Tsuknungtemjen-i Player of the Tournament sempet ngua liasü.

STATE OSANG : Tapak 2 nungi...

CIHSR nung Dengue awareness campaign...

Shisalen sayur Dr. Nokchur Imchen, Consultant, General Medicine, CIHSR ajanga Dengue tashidak clinical symptoms, complications aser public health indang onük nung jembia aser Kikolul Khieya, Assistant Director, UVBDS Dimapur ajanga Dengue victor, iba tashidak poktetba tesem aser azüoktsü mera balala indang jembia liasü.

Iba sülen telok nungi tasüngdangba balala asüngdangba Dr. Limatula Aier, Chief Medical Officer, Dimpaur aser Dr. Nokchur Imchen nati langzua liasü.

Group discussion aser Anti-Dengue action plan ya Dr. Atsung Aier, Senior Consultant Community Health Department, CIHSR lenisüba kübok agia liasü.

Iba awareness sentong

tananü buba nung District Program Officer, NVBDCP, CMO Establishment, Dr. Kavito Zhimomi-i nübur lenirtem dang Dengue virus prokshiba nokdangtsü asoshi nüburtemi shilem agitsü nungdaker ta ashi.

Pai lenirtem dang pei aliba tesem nung nüburtem dang merila apokba tesem agientsü aser talisa August, September aser October ita pei temeket tesemtem konga ayutsü ajungshitsü ayongzuka liasü.

Peter Sangtam, Consultant NVBDCP, CMO Establishment ajanga dengue vector, merila apokba tesem aser azüoktsü mera agiba indang report agüja liasü. Dr. Atsung Aier Sr. Consultant Community Health Department CIHSR lenisüba kübok anti-dengue action plan atema sensaksema liasü.

BENDANGLI OSANG : Tapak 7 nungi...

India-i tsükchir Hasina yarira...

Kiralongrar temi Bangladesh amshia India anema inyaktsü ta bilemba indang jembidang, “Ibaji meshidak angateta ka lir. Ibaji shidak masü. Bangladesh nüchiso bushiba mapang India-i tongtipang shilem agia lir aser onoki India anema menokdaktsü,” ta pai langzü.

“Ozü linük ya tilaba aser medical facilities aser danga osettsüset densema nungdak balala nung India dak metaloka alir, koba ajanga Bangladesh nungi India aser revenue jenti adokdaktsür,” ta pai ashi.

BNP aser Jamaat-e-Islami tsüngta tesendaktep indang asüngdangba mapang, “Tesendaktep ya ideological masü saka tactical lir, koba electoral politics den sendaktepa

lir. Awami League ya Jamaat den alliance liasü. 2018 nungi 2024 tashi BNP ya Jamaat den tesendaktep meliasü. Onok den left-wing aser right-wing alliances liasü, saka Jamaat maden,” ta Roy-i ashi.

Sheikh Hasina-i lar coalition nung Jamaat inok aser tatsüka lir Jamaat den tokteptsü asoshi Hefazat-e-Islam telok tentet. Tang Hefazat ya Awami League anema longkak aiter. Jamaat-i elections aginer.”

Interim government tasen ka kumtetba indang jembidang, kaketshir temi Dr Mohammad Yunus aginü aser non-political interim government ka aginü, anungji BNP-i party nungi tenüng kata magütsü, ta pai ashi.

US, Egypt aser Qatar-i Israel...

Framework agreement ya Tir Biden-i May 31 nü yangluba “principles” nung ajemdaker lir ta ashir, koba ajanga ceasefire tenzüksü aser pua alirtem chioktsü, koba UN Security Council-ia mulunga lir.

US Defence Secretary Lloyd Austin-i Brehostibar nikongdang sangdong ka nung pai Israel Defence Minister Yoav Gallant den region nung US sepaitem temelenshi aliba aser Israel indang defense tashi ajak agi yariba indang jembidgo ta ashi.

“Pua alirtem chioktsüsa ceasefire deal ka renemtsü tongtipang ta ni nenshia shiogo,” ta pai ashi.

Aiben jembishinü liaka ceasefire alitsü aser pua alirtem chioktsü atema tezüngzüktep kati tang tashi maruteti lir.

Hamas-i ceasefire aginer, saka Israel Ato Kilonser

Benjamin Netanyahu-i Hamas madak takok anguba sülen ang rara anentsü ta ashir.

Brehostibarnü Israeli tanen makai Gaza Strip nung bomb poklokja liasü. Israel-i school ana amak aser nisung 18 dak tema tepset ta Gaza indang Hamas meyong civil defence force ajanga ashi. Israel mitkari Hamas command centres nung amak ta ashir.

Haniyeh melen Hamas-i par lenir inyaktsü Yahya sinwar shimba ajanga jembishinü akatsü tasakba akumer. October 7 nü Israel amakba ya Sinwar tasa lir ta ashir aser par telok nung tesashitiba nisung ka lir.

Iran mesüra par tembar temi amaktsü tetsübo nung Brehostibarnü Israel indang security cabinet senden ya underground bunker nung senden mena liasü.

BILEMDANGANG

“Temeimji nai metetba kisung masü nai inyakba nunga lir.”